

09 我做阿爸矣

游雪君

聽阿母講我細漢的時，毋但足愛哭閣真歹睏癖，定定是挂困落去眠床，隨就聽著我佇咧嘛嘛吼，予伊連一屑屑仔歇喘的時間都無。逐遍講到遮，我攞會共阿母應講：「我哪有像你講的遐爾歹育飼啦！」阿母總是那笑那共我講：「另日換你做老爸，你就知影矣！」

有一工老師講伊有準備一个足特別的體驗活動，是欲予阮體驗做爸毋的辛苦。我想講應該就是腹肚藏一粒雞胗仔假做是有身，毋過老師煞對指仔底提一个電子嬰仔出來，伊生做有夠成真正的紅嬰仔，予阮看甲慧神慧神。毋但按呢，伊閣會哭呢！老師講照顧嬰仔真簡單，聽著嬰仔哭的時陣，毋是腹肚枵愛共伊飼奶，就是放屎尿愛換尿苴仔，若無就是想欲司奶愛人共伊抱起來搖。聽老師講甲敢若真的好耍的款，我隨擇手報名，就按呢我就升級做便老爸囉！

挂開始抱嬰仔佇學校行來行去，每一個人攞呵咾我真有範，我嘛感覺家己一定會共嬰仔顧甲真好。毋過就佇我上體育課欲招同學鬥陣拍籃球的時陣，英雄想起老師交代我絕對袂使共囡仔放咧無人照顧，我只好手抱嬰仔，孤單一個人坐佇椅子頂看逐家耍。

啥人知，予我料想袂到的是，嬰仔是無時間觀念的，

不管啥物時陣，想欲哭就大聲吼。抱伊坐公車的時，規車頂的人看我兇兇狂提奶罐仔欲飼奶，一个阿姨驚我無經驗，緊倚來我身軀邊共我指導。轉到厝裡，阿母看著驚一越講：「呔會遮成你細漢的時啦！」聽著嬰仔規暝嘛嘛吼，阿母嘛綴我睏袂落眠，共伊當做是親生的全款，連鞭驚我尿苴仔包袂好勢，連鞭閣驚我無共伊抱予在，規暝無閒頤頤。

「手抱孩兒，才知爸毋時。」看阿母陪伴我照顧這個嬰仔的時陣，毋但真有耐性，閣會教我一寡仔顧囡仔的撇步。我感覺家己實在是足見笑的，阿母自細漢共我搵屎搵尿晟養大漢，我煞遮爾愛應喙應舌，閣予伊為我氣身惱命，就連做老爸這件代誌，嘛愛伊共我鬥相共，想想咧閣真歹勢呢！